



STINAPA TA INFORMA

AMIGU I ENEMIGU DI KORAL

Na Boneiru nos ta bendishoná ku un ref di koral masha bunita. Pa nos manten'é asina lo nos mester tuma algun medida. Tur forma di bida den naturalesa tin su enemigu, meskos ta konta pa koral tambe. Esei no ta asina malu; si no tin influensha djafó e koralnan ta mantené nan mes bon bon. Gutu i otro piská ta morde kita pida koral pa kome. Spòns tambe sa krese tapa e koral, i tin otro menasa natural tambe. Dos tipo di koral por ta bringa otro pa e mesun pida tereno. Nan lo no krese kontra otro, pero na rant di un por ripará ku e ta impedí e otro di sigui krese. Koral tambe por bira malu dor di bakteria òf beskein. Ora ku e kondishonnan rondó di nan ta kambia hopi, nan ta reakshoná riba e kambionnan. Por ehèmpel ora ku temperatura di awa ta s ubi, nan ta bira blanku pasobra e matanan minúskulo ku ta biba den nan ta salí for di e koral. Esaki ta hasi nan mas vulnerabel pa malesa. Un par di aña pasá e koralnan a sufri hopi dor di e tormenta tropikal Lenny. Partikularmente e koralnan den awa mas plat a dañá hopi. Pero ya kaba por ripará ku e koralnan a kuminsá krese di nobo. Pero lástimamente e dañó mas grandi na koral ta kousá pa hende. En realidat hende no ta supous di ta den e ref mes. Nos ta purba siña mas tantu di e refnan, pa por purba di redusí e dañó. Asina a prohibí uso di anker, pasobra nan por bòlter hinter un kolonia di koral. Tampoko nos mester mishi ku e koral. Nan eskeleta tin rant hopi skèrpi, pero tambe por dañá a lag protektivo ku tin riba e koral. Asta si nos no ta den awa, nos por kousa hopi dañó dor di polushon. Ora ta traha edifisio muchu serka di awa, i hopi awa, santu òf semènt ta bai den awa, bo ta ripará esei mesora. E awa ta bira sushi, lokual ta evitá rayonan di solo yega na e koral, i koral mester di lus di solo! Lodo i semènt ta sak bai riba koral i ta stek nan. Pasobra e suela di Boneiru ta di kleps, i kleps ta pasa awa sushi ku nos ta manda den tera, hopi produkto ta laba bai laman. Habon di laba paña, venenu, mèrs kímiko i hopi otro kos ta pasa bai laman i resultá riba e koralnan. Mas nos sa di e koralnan, mas nos sa kiko pa hasi i keda sin hasi pa tene e refnan bunita i salú. *Skirbí pa Sabine Engel, tradusí pa Marcel Nahr.*

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESA



Traha huntu na un desaroyo duradero pa Boneiru